



КЮУШУ МОНГОЛЫН “ТООНО” НАЙРАМДАЛЫН ХОЛБОО

ҮҮСЭХ БОЛСОН ТҮҮХ

Япон улсын Кюүшү аралд амьдарч байсан Монгол залуусын дунд Монголчуудын холбоо байгуулах санаа яригдаж явсаар 2011 оны 3-р сарын 11-ний Фукушимагийн газар хөдлөлтийн үеэр биелэлээ олсон юм.

Учир нь энэ байгалийн гамшиг олон зуун хүний амь насыг авч одсон ба Фукуокад амьдарч байсан Монголчууд маань нэгдсэн нэг зохион байгуулалтанд орох чухал хэрэгцээг мэдэрч холбоогоо байгуулахаар сэтгэл шулуудсан юм. Кюүшүд шинээр ирж буй болон Кюүшүгээс явж буй хүмүүс, тэдний гэр бүлийнхэнийх нь тухай бүртгэлтэй байх, Монголынхоо соёлыг танилцуулах, мэдээллээ цаг алдалгүй хоорондоо солилцох, шинээр ирж буй гэр бүл болон тусламж хэрэгтэй нэгэндээ туслах гэсэн зорилгоор 2011 оны 3-р сарын 20-ний нэгэн бороотой өдөр Кайзука паркард анхныхаа хурлаа хийж холбооны дарга болон удирдах зөвлөлийн гишүүдээ сонгосон юм.

Тэр өдрөө 22,000 япон иен цуглуулан гамшигт нэрвэгдсэн Фукушима мужид илгээж, энэ тухай “Ниши Нихон ” сонинд нийтлэгдэж байсан.

Холбоогоо нэгэн доор цуглардаг, Монгол хүний халуун дулаан сэтгэлийг нэгтгэдэг гэрийн тооноор “ТООНО” хэмээн нэрлэх саналыг Ш. Алтан-Эрдэнэ дэвшүүлж хэлэлцсэний эцэст “ТООНО” хэмээн нэрлэх болсон юм. Холбооны эмблемийн дизайныг А.Самбуу, Саранхүү нар зохион бүтээсэн.

Ийнхүү 2011 оны 4 сараас Фукуока мужид албан ёсны бүртгэлтэйгээр үйл ажиллагаагаа явуулах нэгэн холбоо мэндэлсэн билээ. Энэ үеэс хойш Наадам, цагаан сар, спортын тэмцээн, шинээр ирсэн оюутан залуустаа яриа хийх, япон улсад төвхөнөхөд нь туслах зэрэг ажлуудыг холбооны үе үеийн гишүүд маань сайн дурын үндсэн дээр хийж ирсэн байна.

ЗОРИЛГО

Холбооны зорилго нь Япон улсын Кюүшү аралд оршин сууж буй монгол иргэддээ туслах, оюутнуудад хандсан сургалт, семинарыг зохион байгуулах, Монголын соёлыг түгээн дэлгэрүүлэх замаар хоёр орны найрамдалт харилцааг улам батжуулах явдал юм.

ҮЙЛ АЖИЛЛАГААНЫ ЧИГЛЭЛ

- Кюүшү аралд оршин сууж буй монгол иргэддээ туслах
- Шинээр ирж буй оюутнууд, дэвшин суралцаж буй оюутнуудад уулзалт, семинар хийх
- Монголын соёлыг түгээх
- Дээрхи зорилготой уялдаатай бусад үйл ажиллагаа

ХОЛБООНЫ ТОЙМ

НЭР

Кюүшү Монголын “ТООНО” Найрамдалын Холбоо

НИЙТ ГИШҮҮДИЙН ТОО

Япон улс болон Монгол улсад оршин сууж буй нийт 805 гишүүн (2022 оны 2-р сарын 28-ний байдлаар)

ХОЛБОО БАРИХ

12-1 Kanzeonji 5, Dazaifu city, Fukuoka Prefecture 818-0101

TEL 070-4547-9785

FAX 092-776-9464



ХОЛБООНЫ ТЭРГҮҮН

Сайн байцгаана уу.

Миний бие 2020 онд Нагояа их сургуулийн Эдийн Засгийн Тэнхимийг магистр зэрэгтэйгээр төгсөж, тус оны хавраас өдийг хүртэл Америкийн State Street банкны Фүкүока хот дахь салбарт ажиллаж байна.

Өмнө нь Япон улсын Тохоку болон Тоокай бүс нутгуудад тодорхой хугацаанд амьдарч үзсэн тул энэ удаа Кюүшү арал хэмээх баялаг соёл түүхтэй, үзэсгэлэнт байгалтай газар гэр бүлийн хамт амьдрах завшаан тохиосонд их баяртай байдаг.

Фүкүока хотод ирээд удаагүй байгаа ч гэсэн олон хүмүүстэй танилцаж нөхөрлөн, Кюүшү бүс нутгийн зон олон Монголчуудтай маш элгэмсүү найрсаг харилцаатай байдгийг мэдэж авсан. Иймд цаашид ч хоёр орны нөхөрлөлийг улам бат бэх болгох, илүү өргөн хүрээнд биесээ таниж мэдэхийн төлөө холбооны тэргүүний хувьд хичээх болно.

“ТООНО” холбоо маань цэвэр сайн дурын үндсэн дээр үйл ажиллагаа явуулдаг тул бидэнтэй хамт соёл, спортын, нийгэмд тустай олон арга хэмжээг зохион байгуулах, эсвэл магадгүй та өөрөө ч шинэ санаачлага гаргаж хандвал бид баяртайгаар хүлээн авах болно. Хамтдаа хичээцгээе!

О. Боролдой



ХОЛБООНЫ ДЭД ТЭРГҮҮН

Сайн байцгаана уу? Эрхэм хүндэт, Кюүшү болон Окинава аралд сурч, хөдөлмөрлөж оршин сууж буй нийт Монголчууддаа энэхүү өдрийн мэндийг хүргэе.

Миний бие анх 2015онд Фүкүока хотын FLA Academy-д хэлний бэлтгэлээр хүрэлцэн

ирж суралцаж төгсөөд, Кюүшү Мэдээлэл Зүйн Их Сургууль (九州情報大学経営学部) д амжилттай элсэн орж бизнесийн удирдлагын чиглэлээр бакалаврын зэргийн ангид суралцаж байна.

Энэ жилээс тус холбооны дэд тэргүүнээр сонгогдож ажиллах болсондоо туйлын их баяртай байна.

Кюүшү, Окинава аралд амьдран сууж буй монгол хүн бүрийн оролцоо, дэмжлэг туслалцаа бидний үйл ажиллагаанд ус, агаар мэт чухал учир хамгийн сайнаараа хичээцгээе.

Ж. Эрдэнэбат